

**Uunga siunnersuut: Akileraaruserinermik ingerlatsineq pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2016-imeersoq**  
(Aningaasaqarnermut Aatsitassanullu Naalakkersuisoq)

**Saqqummiussissut**

(Aningaasaqarnermut Aatsitassanullu Naalakkersuisoq)

**Siullermeerneqarnera**

Naalakkersuisut sinnerlugit akileraaruserinermik ingerlatsineq pillugu Inatsisartut inatsisaata allanngortinnera pillugu siunnersuummik matumuuna saqqummiussaqaassaanga.

Soraarnerussutisiaqarnissamut aaqjissuussinernik piffissaanngitsukkut tigusinermit akitsuutinit isertitat ullumikkut 5 mio. kr.-t missaanniipput. Isertitat ukiut tamaasa kommunit namminersorlutillu oqartussat akornanni agguaaneqartarput. Aningaasat amerlassusaannut tunngatillugu, allaffissornikkullu suliaqarnertaa eqqarsaatigalugit, ajornannginnerussaaq akitsuutit Nunatta Karsianut pigisassanngortinneqartalerpata, kommunillu iluanaarutininik annaasaannut, kommuninut ataatsimoortumik tapiissutit qaffannerisigut taarsiissutigineqarlutik.

Soraarnerussutisiaqalernissamut inuunermullu sillimmasiisarnermut ingerlatseqatigiiffiup nunatsinniittup ataatsip maannakkut Kalaallit Nunaanni suliniutimi atorunnaarsinniarlugit isumaliuteqarmat. Isumaliutit piviusunngortinneqassappata, missiliorneqarpoq akitsuutininik akiliinermi 330 mio.kr.-t pissarsiarineqassasut. Aningaasat taakku siunnersuutip kinguneratigut aamma Nunatta Karsianut pigisassanngortinneqassapput.

Ataasiaannarluni isertitassat annertunerpaartaasa, nunami soqutigisanut uungaannaq isigisunut pingaarnersiorneqarnissai siunnersuutip pinaveersaartissavaa. Siunnersuutip tunngavilersorpaa, pisortani aningaasartuutini aningaasaliinernilu pilersaarutaasumik ineriartortoqarsinnaasoq, piffissaq qaninneq eqqarsaatigalugu nunami aningaasaqarnikkut kiisalu suliaqarfii ilaanni suliffinnik malinnaajunnaartitsinermit aarlerinaatinik pinngitsoortitsisussamik.

Ataasiarluni isertitaasartut immikkut ittut taamaattut aningaasaqarnikkut ineriartornermut atasinnaasumut nunamut tamarmut iluaqutaasussamik ikorfersuisumut atorneqarnissai anguniarlugu, siunnersuutigineqarpoq akitsuutinit isertitat piffissaq ungasissoq eqqarsaatigalugu aningaasaateqarfimmut ilineqassasut. Aningaasaateqarfiup atorfia il.il Kommunit Namminersorlutillu Oqartussat missingersuutaat naatsorsuutaallu pillugit

Inatsisartut inatsisaannut siunnersuummi § 18, imm. 3, nr. 4-mi sukumiinerusumik nassuiarneqarput.

Naggataatigut inatsisissatut siunnersuummut oqaaseqaatinullu tassunga tunngasunut innersuussissaanga.

Taamatut oqaaseqarlunga Naalakkersuisut sinnerlugit, siunnersuut Inatsisartunut suliassanngortippara.